

Segun Pastor Lampe:

Gobierno, poder ehecutivo y poder hudicial ta hibando Aruba riba un direccion peligroso!



ORANJESTAD (AAN) -- "Accion Aruba Dushi Tera" a convoca un rueda di prensa, cual a tuma lugar ayera mainta na Centro Educativo Cristian, atraves di cual Pastor Lampe y Luigi Bergen a elabora riba un accion cu lo cuminsa otro siman, cual ta carga e number di "accion Respetami".

Prome persona cu a hiba palabra ta Pastor Lampe, ken segun su apreciacion, e politica di nos tres podernan na Aruba, esta Gobierno, Poder Ehecutivo y Poder Hudicial ta creando un situacion di desorden, cu ta hibando nos pais riba un direccion peligroso. Como "subversivo" el a califica e tres podernan cu ta dirigi nos pais stima, Aruba.

Pastor Lampe ta convenci cu hopi di nos ciudadanonan ta sumamente preocupa pa e situacion na nos Isla.

El a expresa cu e gota cu a pone e hemchi basha over e ultimo dlanan aki, ta ora a sali na cla cu un Arubiano humilde ta worde hostiga pa e sali y bandona un tereno pega na Parke Arikok, unda e ta bibando for di hopi aña caba,

(RED: Lesa pagina 49 y 50) mientras cu na mesun momento tin indicacion cu e proyecto "Parke Avestruz" ta practicamente cla pa continua cu tur e permisonan necesario.

"Nos ta kere cu e situacion aki unda un Arubiano humilde ta worde perhudica di su interes y un empresario sudafricano, cu ta representa interesnan grandi, si ta haya cierto privilegionan riba nos Arubianonan humilde, ta muestra bon cla cu nos ta bayendo den un direccion cu nos pueblo no a vota pe", Pastor Lampe a acentua.

Pa loke ta trata gobierno, e sacerdote a señala cu pueblo di Aruba den su mayoria a pone e partidonan cu awor ta den gobierno gana e ultimo eleccion, pa nan sirbi e interes di e mayoria y no pa nan goberna contra e interes di e mayoria manera ta pasando actualmente.

Encuanto e Poder Ehecutivo pastor Lampe ta critica su tolerancia, por ehemplo den e proyecto di racetrack, unda di

4.2 milyon dollar di placa di pueblo un milyon a bay pa interesnan priva di esnan cu ta tras di e proyecto, violando tur e leynan di contabilidad al respecto.

Ademas Parlamento a aproba e ley di dividendo di belasting, loke ta un violacion na nos constitucion.

Siguiendo cu e Poder Hudicial, Pastor Lampe a expresa cu mientras PG a constata cu den e caso di Radisson delitonan a worde comete, na mesun momento a bisa cu no tin castigo.

Esaki kiermen, segun e sacerdote, cu e tres podernan a bira subversivo pa cu e orden legal di Aruba.

"Pesey nos ta kere cu a yega e momento pa nos pueblo manda un mensahe bon cla contra e subversivonan den gobierno, den parlamento, y den nos poder hudicial", Pastor Lampe a enfatiza.

Pastor Lampe a bisa cu ora e estado di derecho di un pais ta worde poni un banda door di e tres podernan, e ora ey e pueblo mester sali na defensa

di su estado di derecho y su legalidad, y pesey mes aworaki "Accion Aruba Dushi Tera", mirando e situacion peligroso cu e tres podernan mes di nos pais a crea, lo bin cu accion pa asina restablece orden, nos legali-

dad, y nos estado di derecho. E accion aki cu lo cuminsa otro siman lo carga e number di "Accion Respetami".

Seguidamente pastor Lampe a pasa palabra pa Luigi Bergen, pa e splica di kico e accion aki ta consisti.